



ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ
ԳՆՈՒՄՆԵՐԻ ՀԵՏ ԿԱՊՎԱԾ ԲՈՂՈՔՆԵՐ
ՔՆՆՈՂ ԱՆՁ

ք. Երևան

29.01.2019թ.

Ո Ր Ո Շ ՈՒ Մ

ՀՀ գնումների հետ կապված բողոքներ քննող անձի
թիվ ՍՑ-ԱՄ-2019/02

Հայաստանի Հանրապետության գնումների հետ կապված բողոքներ քննող անձ Միեր Անանյանս, ուսումնասիրելով Հայաստանի Հանրապետության ֆինանսների նախարարության 09.01.2019թ. թիվ 26-3/93-19 գրությամբ «ՄԱԴԷԼ» ՍՊԸ-ին գնումների գործընթացին մասնակցելու իրավունք չունեցող մասնակիցների ցուցակում ներառելու նպատակով նախաձեռնված ընթացակարգով ներկայացված հիմքերը, պարզեցի հետևյալը.

1. ՀՀ ֆինանսների նախարարության ներկայացրած փաստերը և պահանջը.

ՀՀ ֆինանսների նախարարությունը, «Խարբերդի մասնագիտացված մանկատուն» ՊՈԱԿ-ի (այսուհետ՝ Պատվիրատու) 24.12.2018թ. թիվ Ե-699 գրության հիման վրա 09.01.2019թ. թիվ 26-3/93-19 գրությամբ դիմել է ՀՀ գնումների հետ կապված բողոքներ քննող անձին՝ խնդրելով նախաձեռնել «ՄԱԴԷԼ» ՍՊԸ-ին (այսուհետ՝ Ընկերություն) գնումների գործընթացին մասնակցելու իրավունք չունեցող մասնակիցների ցուցակում ներառելու ընթացակարգ:

2. «ՄԱԴԷԼ» ՍՊԸ-ի ներկայացրած փաստարկները և դիրքորոշումը.

Գնումների հետ կապված բողոքներ քննող անձի սույն որոշումը կայացվելու օրվա դրությամբ «ՄԱԴԷԼ» ՍՊԸ-ի կողմից որևէ դիրքորոշում չի ներկայացվել:

Ընկերությունը, պատշաճ ծանուցված լինելով ՍՅ-ԱՄ-2019/02 ընթացակարգի շրջանակներում 15.01.2019թ. ժամը 10:30-ին հրավիրված նիստի վերաբերյալ, չի ապահովել իր ներկայացուցչի մասնակցությունը:

3. «Խարբերդի մասնագիտացված մանկատուն» ՊՈԱԿ-ի կողմից ներկայացված փաստարկները և դիրքորոշումը.

«Խարբերդի մասնագիտացված մանկատուն» ՊՈԱԿ-ը ՀՀ ֆինանսների նախարարությանն ուղղված 24.12.2018թ. թիվ Ե-699 գրությամբ հայտնել է, որ Աշխատանքի և սոցիալական հարցերի նախարարության և «ՄԱԴԷԼ» ՍՊԸ-ի միջև 30.0.2018թ. կնքված «Խարբերդի մասնագիտացված մանկատուն» ՊՈԱԿ-ի կարիքների համար փափուկ գույքի և հանդերձանքի ձեռքբերման նպատակով «ԱՍՀՆ-ՊՈԱԿ-ԳՀԱՊԶԲ-18/8-Ա-Մ» ծածկագրով պայմանագրի շրջանակներում, պայմանագրի էական խախտումների հետևանքով «Խարբերդի մասնագիտացված մանկատուն» ՊՈԱԿ-ը միակողմ հրաժարվել է և լուծել է կողմերի միջև կնքված մատակարարման պայմանագիրը՝ չմատակարարված ապրանքատեսակների մասով:

Պատվիրատուն, պատշաճ ծանուցված լինելով ՍՅ-ԱՄ-2019/02 ընթացակարգի շրջանակներում 15.01.2019թ. ժամը 10:30-ին հրավիրված նիստի վերաբերյալ, չի ապահովել իր ներկայացուցչի մասնակցությունը:

4. ՍՅ-ԱՄ-2019/02 ընթացակարգի քննության համար էական նշանակություն ունեցող փաստերը.

ՍՅ-ԱՄ-2019/02 ընթացակարգի քննության համար էական նշանակություն ունեն հետևյալ փաստերը՝

1. «Խարբերդի մասնագիտացված մանկատուն» ՊՈԱԿ-ի և «ՄԱԴԷԼ» ՍՊԸ-ի միջև 30.05.2018թ. կնքվել է «ԱՍՀՆ-ՊՈԱԿ-ԳՀԱՊՁԲ-18/8-Ա-Մ» ծածկագրով «Խարբերդի մասնագիտացված մանկատուն» ՊՈԱԿ-ի կարիքների համար հանդերձանքի և անկողնային պարագաների մատակարարման պայմանագիր (այսուհետ՝ Պայմանագիր), որի համաձայն՝ Ընկերությունը պարտավորվել է Պայմանագրի կնքման պահից մինչև 15.12.2018թ. Պատվիրատուի գնման հայտի հիման վրա «Խարբերդի մասնագիտացված մանկատուն» ՊՈԱԿ-ին մատակարարել հանդերձանք և անկողնային պարագաներ:

2. «ՄԱԴԷԼ» ՍՊԸ-ին ուղղված 24.12.2018թ. թիվ Ե-698 գրությամբ «Խարբերդի մասնագիտացված մանկատուն» ՊՈԱԿ-ը հայտնել է, որ հիմք ընդունելով «Խարբերդի մասնագիտացված մանկատուն» ՊՈԱԿ-ի և «ՄԱԴԷԼ» ՍՊԸ-ի միջև 30.05.2018թ. կնքված պայմանագրի 2.1.1 կետը «Խարբերդի մասնագիտացված մանկատուն» ՊՈԱԿ-ը միակողմանի լուծում է պայմանագիրը՝ չմատակարարված ապրանքատեսակների մասով:

5. ՀՀ գնումների հետ կապված բողոքներ քննող անձի հիմնավորումները և եզրահանգումը.

ՀՀ գնումների հետ կապված բողոքներ քննող անձ՝ Միեր Անանյանս, ուսումնասիրելով ՀՀ ֆինանսների նախարարության 09.01.2019թ. թիվ 26-3/93-19 գրությունը, «Խարբերդի մասնագիտացված մանկատուն» ՊՈԱԿ-ի 24.12.2018թ. թիվ Ե-699 գրությունը և կից փաստաթղթերը, հայտնում եմ հետևյալը.

ՀՀ քաղաքացիական օրենսգրքի 345-րդ հոդվածի 1-ին մասի համաձայն՝ պարտավորության ուժով մի անձը (պարտապանը) պարտավոր է մեկ այլ անձի (պարտատիրոջ) օգտին կատարել որոշակի գործողություն. այն է՝ վճարել դրամ, հանձնել

գույք, կատարել աշխատանք, մատուցել ծառայություն և այլն, կամ ձեռնպահ մնալ որոշակի գործողություն կատարելուց, իսկ պարտատերն իրավունք ունի պարտապանից պահանջել կատարելու իր պարտականությունը:

Նույն օրենսգրքի 408-րդ հոդվածի համաձայն՝ **պարտավորության խախտում է համարվում այն չկատարելը կամ անպարշաճ (կեղանցով, ապրանքների, աշխատանքների և ծառայությունների թերություններով կամ պարտավորության բովանդակությամբ որոշվող այլ պայմանների խախտմամբ) կատարելը:**

«Գնումների մասին» ՀՀ օրենքի (այսուհետ նաև՝ Օրենք) 6-րդ հոդվածի 1-ին մասի 6-րդ կետի համաձայն՝ բացառությամբ նույն օրենքի 23-րդ հոդվածի 1-ին մասի 1-ին, 3-րդ, 4-րդ և 5-րդ կետերով նախատեսված ընթացակարգով գնում կատարելու դեպքերի, գնումների ընթացակարգերին մասնակցելու իրավունք չունեն այն անձինք, որոնք հայտը ներկայացնելու օրվա դրությամբ ներառված են գնումների գործընթացին մասնակցելու իրավունք չունեցող մասնակիցների ցուցակում: Մասնակիցն ընդգրկվում է նշված ցուցակում, եթե՝

ա. **խախտել է պայմանագրով նախատեսված** կամ գնման գործընթացի շրջանակում ստանձնած **պարտավորությունը, որը հանգեցրել է պատվիրատուի կողմից պայմանագրի միակողմանի լուծմանը** կամ գնման գործընթացին տվյալ մասնակցի հետագա մասնակցության դադարեցմանը,

բ. որպես ընտրված մասնակից հրաժարվել է պայմանագիր կնքելուց,

գ. հայտերը բացելուց հետո հրաժարվել է գնման գործընթացին հետագա մասնակցությունից:

Օրենքի 6-րդ հոդվածի 2-րդ մասը սահմանում է, որ գնումների գործընթացին մասնակցելու իրավունքից զրկված մասնակցի վերաբերյալ ունեցած տեղեկությունների հիման վրա լիազորված մարմինը ընթացակարգ է նախաձեռնում գնումների հետ կապված բողոքներ քննող մարմնում՝ առանց վճարի: Տվյալ մասնակցի կարծիքը լսելուց հետո գնումների հետ կապված բողոքներ քննող անձը սույն օրենքի 50-րդ հոդվածի 6-րդ մասով սահմանված ժամկետում որոշում է կայացնում մասնակցին սույն հոդվածով նախատեսված ցուցակում ընդգրկելու վերաբերյալ: Անձը նշված ցուցակում ընդգրկվում է երկու տարի ժամկետով:

«Խարբերդի մասնագիտացված մանկատուն» ՊՈԱԿ-ի և «ՄԱԴԷԼ» ՍՊԸ-ի միջև 30.05.2018թ. կնքվել է «ԱՍՆ-ՊՈԱԿ-ԳՀԱՊՁԲ-18/8-Ա-Մ» ծածկագրով «Խարբերդի մասնագիտացված մանկատուն» ՊՈԱԿ-ի կարիքների համար հանդերձանքի և անկողնային պարագաների մատակարարման պայմանագիր, որի 1-ին կետի 1.1 ենթակետի համաձայն՝ «ՄԱԴԷԼ» ՍՊԸ-ն պարտավորվել է պայմանագրով սահմանված կարգով, ծավալներով, ժամկետներում և հասցեով Գնորդին մատակարարել պայմանագրի N 1 հավելվածով՝ Տեխնիկական բնութագիր-գնման-ժամանակացուցով նախատեսված ապրանքը (այսուհետ՝ ապրանք), իսկ Գնորդը պարտավորվել է ընդունել ապրանքը և վճարել դրա համար:

Պայմանագրի 2.5-րդ կետով սահմանվել է, որ ՀՀ կառավարության 04.05.2017թ. N 526-Ն որոշմամբ հաստատված «Գնումների գործընթացի կազմակերպման» կարգի (այսուհետ՝ Կարգ) 104-րդ կետի պահանջներին համապատասխան Պայմանագրով սահմանված Գնորդի իրավունքների և պարտականությունների իրականացումը վերապահվում է «Խարբերդի մասնագիտացված մանկատուն» ՊՈԱԿ-ին:

Պայմանագրի N 1 հավելվածի՝ Տեխնիկական բնութագիր-գնման ժամանակացույցի, համաձայն՝ «ՄԱԴԷԼ» ՍՊԸ-ն պարտավորվել է պայմանագրի կնքման պահից մինչև 15.12.2018թ. Պատվիրատուի գնման հայտի հիման վրա «Խարբերդի մասնագիտացված մանկատուն» ՊՈԱԿ-ին մատակարարել հանդերձանք և անկողնային պարագաներ:

18.08.2018թ. Պատվիրատուի կողմից կազմված արձանագրությամբ արձանագրվել է, որ Պայմանագրի շրջանակներում «Խարբերդի մասնագիտացված մանկատուն» ՊՈԱԿ-ի կողմից հայտ է ներկայացվել «ՄԱԴԷԼ» ՍՊԸ-ին, որում նշված է մատակարարման վերջնաժամկետ 12.12.2018թ.: Մինչ 18.12.2018թ. հայտով սահմանված ապրանքատեսակները չեն մատակարարվել: Ընկերության կողմից խախտվել է Պայմանագրի 1.1 կետը: Պատասխանատու ստորաբաժանումը որոշում ընդունեց Ընկերությանը տալ 2 օր ժամանակ, մինչև 21.12.2018թ. ժամը 14:00-ն, մատակարարելու հայտով սահմանված ապրանքատեսակները:

18.12.2018թ. «Խարբերդի մասնագիտացված մանկատուն» ՊՈԱԿ-ի կողմից «ՄԱԴԷԼ» ՍՊԸ-ին ներկայացվել է գնման հայտ, որի համաձայն՝ Ընկերությանն առաջարկվել է

մինչև 21.12.2018թ. ժամը 9:30-ից 14:00-ն մատակարարել հայտով ներկայացված ապրանքատեսակները:

«ՄԱԴԷԼ» ՍՊԸ-ին ուղղված 24.12.2018թ. թիվ Ե-698 գրությամբ «Խարբերդի մասնագիտացված մանկատուն» ՊՈԱԿ-ը հայտնել է, որ հիմք ընդունելով «Խարբերդի մասնագիտացված մանկատուն» ՊՈԱԿ-ի և «ՄԱԴԷԼ» ՍՊԸ-ի միջև 30.05.2018թ. կնքված պայմանագրի 2.1.1 կետը «Խարբերդի մասնագիտացված մանկատուն» ՊՈԱԿ-ը միակողմանի լուծում է պայմանագիրը՝ չմատակարարված ապրանքատեսակների մասով:

Այսպիսով՝ Պայմանագրի 2.1.7-րդ կետով և նույն կետի 2.1.7.1 ենթակետով սահմանվել է, որ Գնորդն իրավունք ունի միակողմանի լուծել պայմանագիրը (լրիվ կամ մասնակի), եթե Վաճառողն էականորեն խախտել է պայմանագիրը.

2.1.7.1 Վաճառողի կողմից պայմանագիրը խախտելն էական է համարվում, եթե՝

ա) մատակարարվել է անպատշաճ որակի ապրանք որը չի կարող փոխարինվել Գնորդի համար ընդունելի ժամկետում.

բ) ապրանքի մատակարարման ժամկետները խախտվել են 10 օրից ավելի:

«Գնումների մասին» ՀՀ օրենքի 6-րդ հոդվածի 1-ին մասի 6-րդ կետի «ա» ենթակետը սահմանում է, որ մասնակիցն ընդգրկվում է գնումների գործընթացին մասնակցելու իրավունք չունեցող մասնակիցների ցուցակում խախտել է պայմանագրով նախատեսված պարտավորությունը, որը հանգեցրել է պատվիրատուի կողմից պայմանագրի միակողմանի լուծմանը:

Այսպիսով՝ արձանագրում եմ, որ «ՄԱԴԷԼ» ՍՊԸ-ն «Խարբերդի մասնագիտացված մանկատուն» ՊՈԱԿ-ի և Ընկերության միջև 30.05.2018թ. կնքված «ԱՍՀՆ-ՊՈԱԿ-ԳՀԱՂՁԲ-18/8-Ա-Մ» ծածկագրով պայմանագրի շրջանակներում չի իրականացրել Պայմանագրով նախատեսված ապրանքները մատակարարելու իր պարտականությունն, էականորեն խախտելով Պայմանագիրը, ուստի նման պայմաններում գտնում եմ, որ «ՄԱԴԷԼ» ՍՊԸ-ն թույլ է տվել Օրենքի 6-րդ հոդվածի 1-ին մասի 6-րդ կետի «ա» ենթակետով նախատեսված պայմանագրային պարտավորության խախտում, որը հանգեցրել է Պատվիրատուի կողմից պայմանագրի միակողմանի լուծմանը:

Ելնելով վերոգրյալից և ղեկավարվելով «Գնումների մասին» ՀՀ օրենքի 50-րդ հոդվածի 7-րդ մասի 2-րդ կետով՝

Ո Ր Ո Շ Ե Ց Ի

Հայաստանի Հանրապետության ֆինանսների նախարարության 09.01.2019թ. թիվ 26-3/93-19 գրությամբ «ՄԱԴԷԼ» ՍՊԸ-ին (ՀՎՀՀ՝ 00907267) գնումների գործընթացին մասնակցելու իրավունք չունեցող մասնակիցների ցուցակում ներառելու նպատակով նախաձեռնված ընթացակարգը բավարարել և «ՄԱԴԷԼ» ՍՊԸ-ին ընդգրկել գնումների գործընթացին մասնակցելու իրավունք չունեցող մասնակիցների ցուցակում՝ ՀՀ գնումների հետ կապված բողոքներ քննող անձի որոշումն ուժի մեջ մտնելու օրվանից հաշված երկու տարի ժամկետով:

ՀՀ գնումների հետ կապված բողոքներ քննող անձի որոշումն իրավապարտադիր է և ուժի մեջ է մտնում տեղեկագրում հրապարակվելու հաջորդ օրը:

ՀՀ գնումների հետ կապված բողոքներ քննող անձի որոշումը կարող է փոփոխվել կամ վերացվել, այդ թվում՝ մասնակի, միայն դատարանի կողմից:

Գնումների հետ կապված
բողոքներ քննող անձ՝



ՄՀԵՐ ԱՆԱՆՅԱՆ